

LISTOVI...

GRAČANIČKI GLASNIK
časopis za kulturnu historiju

Broj 53
Godina XXVII
Maj, 2022.
[str. 359-370]

© Monos 2022

LISTOVI...

Listovi gračaničkog kalendara od 1. 11. 2021. do 1. 5. 2022.

Prof. dr. Omer Hamzić

8. 11. 2021.

Umro Omer Delić – dugogodišnji glavni urednik Radio Gračanice

Rođen je 1959. godine u Malešićima, gdje je završio osnovnu školu, a potom i gimnaziju u Gračanici, te Fakultet političkih nauka (smjer sociologija) u Sarajevu. Prvo zaposlenje dobio je, 1983. godine u Narodnom univerzitetu (sadašnji BKC) na poslovima novinara Radio Gračanice, gdje će ostati do penzionisanja (prijevremenog – zbog zdravstvenih problema). U dva navrata obavljao je dužnost glavnog i odgovornog urednika Radio Gračanice: od 1990. godine do kraja 1992. i od 2002. do odlaska u penziju. Kratko vrijeme, od 2000. do 2002. radio je i na poslovima informisanja u opštini Gračanica. Osim u informativnim programima Radio Gračanice, povremeno je objavljivao svoje priloge i u drugim medijima. Trudio se da unapređuje informativne programe Radio Gračanice, da očuva objektivnost i profesionalan odnos u pristupu svakoj novinarskoj temi. Autor je knjige "Otpor agresiji s Ozrena" (1999.) U sjećanju mlađih kolega ostat će u lijepom sjećanju kao korektan rukovodilac i učitelj. Ukopan je u porodičnom groblju Čehanovac (kamenik) u Malešićima

19. 11. 2021.

Tematska sjednica Gradskog vijeća: na dnevnom redu – zdravstvena zaštita

Nakon učestalih primjedbi i pritužbi građana na rad Opće bolnice i Doma zdravlja u Gračanici, zakazana je i održana sjednica Gradskog vijeća o stanju u Domu zdravlja i Općoj bolnici "Dr. Mustafa Beganović". Na sjednici su dati odgovori i razjašnjenja u vezi sa radom te dvije zdravstvene ustanove. Prema izvještaju "Avaza", Građani su u pismenoj formi pitali, između ostalog, zbog čega se plaćaju mamografski pregledi, zbog čega u nekoliko mjesnih zajednica nema ambulantni porodične medicine, te o CT pregledima itd. Odgovore su pokušali dati di-

rektori te dvije ustanove Jusuf Hodžić (Dom zdravlja) i Jasmin Hadžić (Opća bolnica). Usput su spominjali rezultate koje su ove dvije zdravstvene ustanove ostvarile u proteklom periodu, a posebno u vrijeme pandemije, ali i objektivne probleme s kojima se suočavaju, počevši od nedostatka kadra, opreme... Malo je bilo riječi o propustima u organizaciji i drugim unutrašnjim slabostima u tim ustanovama. Objašnjeno je da u mjesnim zajednicama Pribava, Lohinja Donja, Babići, Škahovica, Prijeko Brdo, ne rade ambulante porodične medicine, zbog toga što u njima nema dovoljno osiguranika prema utvrđenim normativima.... Nakon iscrpne rasprave, Vijeće je usvojilo zaključke, a vijećnici su sjednicu ocijenili korisnom, Zaključci su uglavnom upućeni prema višim organima vlasti i Fondu zdravstvenog osiguranja Tuzla. Malo ih se odnosi na slabosti u obje zdravstvene ustanove na koje su reagovali i sami građani. Od Vlade i Fonda zdravstvenog osiguranja TK traži se povećanje sredstava, da se poveća broj mamografskih pregleda, da se ukinu plaćanje stomatoloških usluga, da se građanima omogući obavljanje CT dijagnostike u Općoj bolnici u Gračanici, a samo u izuzetnim slučajevima u UKC-u, da se omogućiti finansiranje specijalizacije većeg broja ljekara, da se potpuno finansijski pokriju dežurstva specijalista u Općoj bolnici itd. Ipak, većina vijećnika smatra, a to su saopštili i izvjestioci-direktori da su obje zdravstvene ustanove uglavnom izvršile svoje zadatke u teškim uslovima epidemije. Izražavajući zabrinutost zbog pogoršanja epidemiološke situacije uzrokovane pandemijom COVID-19, vijećnici su ponovo pozvali građane Grada Gračanica da se što prije i u što većem broju odazovu pozivu za vakcinisanje, te da se pridržavaju preporučenih epidemioloških mjera kako bi došlo do smanjenja broja oboljelih Covid corona virusom. (izvor: [https://avaz.ba/kantoni/tuzlanski-kanton/697894/-pregledano 22. 11. 2021.\)](https://avaz.ba/kantoni/tuzlanski-kanton/697894/-pregledano-22.-11.-2021.)

25. 11. 2021.

Obilježavanje Dana državnosti, 25. novembra u Gračanici – usvojena Deklaracija o Bosni i Hercegovini

U jutarnjim satima, u organizaciji Sportskog saveza Gračanica upriličena je tradicionalna šetnja do izletišta Vis, pod nazivom "Moja domovina – moj ponos". Obilježavanje je nastavljeno, polaganjem cvijeća na spomen-obilježja u gradu i Svečanom akademijom u velikoj sali BKC-a Gračanica na kojoj su se prisutnima obratili gradonačelnik Nusrat Helić i predsjedavajući Gradskog vijeća Nihad Krajinović. O 25.-om novembru, ZAVNOBIH-u i njegovim odlukama kao i sadašnjem političkom stanju u BiH govorio je akademik prof. dr. Mirko Pejanović, član Ratnog Predsjedništva R BiH. Na ovom skupu usvojena je i Deklaracija o Bosni i Hercegovini u kojoj između ostalog stoji *"Odlučni smo da se jedinstveno suprotstavimo svakom pokušaju razbijanja Bosne i Hercegovine. U zaštitu države i njenih institucija ne smijemo se i nećemo dijeliti. To je jasna poruka koju šaljemo građanima našega grada, ali i cjelokupnoj javnosti. Poučeni tragičnim iskustvom bliske prošlosti i s činjenicama o desetinama hiljada izgubljenih života i razorenih porodica, o neizrecivim patnjama i stradanjima, te neprocjenjivim štetama, apelujemo na razum i pozivamo na dijalog za dobrobit svih građana Bosne i Hercegovine."* U kulturno umjetničkom dijelu programa nastupili su glumac Irfan Kasumović, pijanistica mr. Darija Jahić i violinistica mr. Jasmina Kasumović. Pjesmu "Draga moja BiH" izveo je hor uz pratnju orkestra Osnovne muzičke škole pod mentorstvom profesorice Jasenke Ahmetašević. U foajeu BKC-a, tim povodom, postavljena je izložba "Bosna i Hercegovina u Narodno-oslobodilačkoj borbi 1941.-1945." koji su posjetioci imali priliku pogledati.

26. 11. 2021.**U Gračanici obavljena promocija knjige “Hadži Salim Šabić – čovjek vizije i misije”**

Organizatori promocije bili su Mešihat Islamske zajednice za Hrvatsku iz Zagreba, Muftijstvo Tuzlansko i Medžlis Islamske zajednice Gračanica. Promocija je privukla pažnju velikog broja posjetilaca, koji su došli u veliku salu Bosanskog kulturnog centra da čuju riječ više o životu i djelu Salima Šabića, na dvadesetu godišnjicu njegovog preseljenja. Knjigu su ispisali njegovi najbliži saradnici i prijatelji, koji su iznijeli svoja sjećanja na njegov lik i djelo. Salim Šabić je porijeklom iz gračaničke familije Šabića, odigrao je značajnu ulogu u organizaciji institucija islamske zajednice u Hrvatskoj, gradnji džamije u Zagrebu kao i u organizaciji pomoći BiH, tokom rata i agresije. U najtežim danima za BiH bio je na dužnosti potpredsjednika SDA i jedan je od bliskih saradnika predsjednika SDA Alije Izetbegovića. Promotori knjige su bili dr. Mustafa ef. Cerić i dr. Amir Karić, gosti i kao gosti – muftija zagrebački Aziz ef. Hasanović i muftija tuzlanski Vahid ef. Fazlović.

30. 11. 2021.**Jedanaesta sjednica Gradskog vijeća Gračanica: kulture ima, ipak...**

...iako je najveće interesovanje vijećnika na ovoj sjednici privukao izvještaj o izvršenju Gradskog budžeta za prvih devet mjeseci ove godine, koji će biti osnova za proiciranje gradskog budžeta za 2022. godinu. Za devet mjeseci 2021. godine Budžet je ostvaren u iznosu od 10 271 744 KM ili 97,87% u odnosu na planirana sredstva, što se smatra pozitivnim trendom. Za raspravu o kulturi vijećnicima ponuđen je materijal pod naslovom “Informacija o stanju kulture na području Grada Gračanica”. Materijal je urađen u Bosanskom kulturnom centru, koji je kao nasljednik nekadašnjeg Narodnog univerziteta nosilac razvoja kulture na području Grada. Cilj informacije bio je da odgovori

na pitanje “Ima li kulture u Gračanici?” Na osnovu obilja podataka u prezentiranom materijalu, bez obzira na sva ograničenja i teškoće, i strožiji kritičari mogli bi dati pozitivan odgovor. Značajna će biti iskazana podrška koju je dalo Gradsko vijeće svim subjektima u kulturi, pa se i u ovoj oblasti mogu očekivati bolji dani. Osim Budžeta i kulture Vijeće je na ovoj sjednici, razmatralo i usvojilo i Informaciju o stanju sporta na području Grada Gračanica i Lokalni gender akcioni plan Grada 2022. – 2025.

5. 12. 2021.**Izložbom slika “Historija iluzija” u tuzlanskoj galeriji “MG”, gračanički slikar Nijaz Omerović obilježio 40. godina stvaralačkog rada**

Još u toku agresije na Bosnu i Hercegovinu, Omerović je uradio seriju grafika “Hronika o Bosni”, seriju ratnih plakata, te mapu grafika “Atlantida”, inspirisanu ravnodušnošću Zapada prema tragediji u BiH. Nakon toga, uslijedio je ciklus “Historija iluzija” (predstavljen u Italiji), ciklus “Savremenici” i “Dijalog civilizacije”. Prezentirana izložba u Tuzli, njegova 33. po redu, nastala je iz tri stvaralačka ciklusa ovog umjetnika: “Savremenici”, “Entropija”, i “Dijalog kultura”. Svojevremeno je spisateljica Indira Kučuk Sorguč za ovog slikara napisala da ima “vanredno razvijen historijski osjećaj, fantastičan odnos prema zbilji i golemo znanje o tokovima historije umjetnosti i historije uopće.” Izlagao je diljem BiH i više puta u nekoliko evropskih zemalja. Pored slikarstva, Omerović se bavi i književnim radom. Autor je nekoliko zapaženih knjiga proze: “Knjiga od praha i snova”, “Traktat o zavjeri”, “Đavo, mit i istina- Traktat o zlu”. Pored proze, piše i objavljuje i poeziju. Dio iz tog stvaralačkog opusa prezentiran je u više navrata i u ovom časopisu, posljednji puta u 49 broju, 2001. godine. Otvarajući izložbu, o stvaralaštvu ovog umjetnika nadahnuto je govorio dr. En-

ver Mandžić, akademik emeritus. (izvor: H. Čalić, "Avaz")

10. 12. 2021.

Promocija nove knjige Senahida Kahrimanovića "Priče s početka i na kraju"

Promocija je organizovana u sali Muzičke škole u Gračanici, a o knjizi i njenom autoru govorili su prof. dr. Omer Hamzić, mr. Abdulah ef. Husić i književnik Jakub Džafić. Inače, svoje spisateljske sposobnosti Kahrimanović je pokazao u prethodne četiri objavljene knjige među kojima se posebno ističe "Moja zona odgovornosti" u kojoj je autor dao vlastiti doživljaj rata (1992.-1995.) u rodnom stjepan Polju. Kasnije je napisao dvije knjige publicističkog karaktera: "Kako doživjeti stotu" i "Redžo Hatini", a potom i knjigu pripovjedačke proze "Kuća moje majke", u kojoj je potvrdio svoj osebnjuni književni talenat. Najnovija knjiga pod naslovom "Priče s početka i na kraju" sadrži tridesetak kratkih priča od kojih je 9 autor, u međuvremenu objavio u Časopisu "Gračanički glasnik". Iznoseći svoje impresije o knjizi, prof. dr. Omer Hamzić je, između ostalog rekao: "Žanrovski, to su novele, tematski iz običnog svakodnevnog života u jednoj seoskoj mikrosredini, na prvi pogled obični svakodnevni događaji koji kroz stvaralački postupak autora dobivaju svoju specifičnu dramatiku. Spomenuo bih samo nekoliko naslova: "Svi su joj halili", "Glava na panju", "Horoz", "Prikaza", "Gologuz" i dr. (...) U ovoj prozi nije teško prepoznati Stjepan Polje kao rodno mjesto autora i Gračanicu kao gravitaciono polje u kojem se kretao. To je dekor, to su kulise za svaku njegovu priču. Što se tiče takozvanog "vremena radnje", vidljivo je da u ovoj knjizi Kahrimanović ispisuje priču svoje generacije. To je generacija "pedeset i neke" (prošlog stoljeća) koja je dolazila na svijet u teškim gladnim godinama, poslije uzastopnih suša, velike oskudice, gladi i sva-

kakvih bolešćuga na ovim prostorima", rekao je Hamzić.

14. 12. 2021.

Promocija 52. broja "Gračaničkog glasnika" – tema "Biljeg vremena"

"Časopis za kulturnu historiju «Gračanički glasnik» već punih 26 godina ispisuje kulturno-historijsku i zavičajnu hroniku Gračanice i njene šire okoline. To je do sada ispisana mega hronika od nekih desetak hiljada stranica teksta o ovom kraju, o Bosni i Hercegovini, koja ostaje kao vrijedno kulturno svjedočanstvo o životu ljudi na ovim prostorima od najstarijih vremena do danas", rekao je, otvarajući promociju osnivač i glavni i odgovorni urednik Časopisa, prof. dr. Omer Hamzić. Potom je na temu "Biljeg vremena – gračanički ratni list (1993.-1995.)" govorila dr. Vedada Baraković, profesorica na Filozofskom fakultetu Univerziteta u Tuzli, članica Redakcije tog lista. Evocirane su uspomene i obavljen zanimljiv razgovor o tom gračaničkom ratnom glasilu, čiju tradiciju, kako je rečeno, na neki način nastavlja "Gračanički glasnik". Iz nekadašnje redakcije "Biljega", Pored prof. Baraković i prof. O. Hamzića, promociji su prisustvovali još i Sead Jahić i Zlatan Džinić, te gračanički ratni komandanti Osman Puškar i Ibrahim Nurkić.

30. 12. 2021.

Održana 12. sjednica Gradskog vijeća Gračanica – usvojen Budežet za 2022. –jedenoglasno...

...u iznosu 23.913.473 KM i veći je u odnosu na nacrt cca 9,5 miliona. U tom uvećanje, između ostalog uključena su i kreditna sredstva za završetak Fiskulturne dvorane kod Srednjoškolskog centra u iznosu od 1,2 miliona (koja se, inače gradi od 1998. godine). Usput, data je saglasnost Gradonačelniku da može izvršiti zaduženje Grada za taj iznos. Rečeno je da je i ovaj Budžet razvojni... Usvojen je Program rada Gradskog vijeća za 1922. go-

dinu, kao i plan energetske održivosti razvoja i klimatskih promjena za 2022. Razmatrana je i informacija o stanju spomenika na području grada, zatim o stanju zaštite građana od neeksplozivnih minsko-eksplozivnih sredstava i informacija o upravljanju parking prostorom. Na prijedlog komisije za urbanizam i ekologiju, vijećnici su usvojili zaključak da se od institucija entiteta Republike srpske zatraži da obustavi sve radnje vezane za geografsko istraživanje na planini Ozren.

4. 1. 2022.

Obnoviteljsko-restauratorski radovi na Dershani Osman-kapetanove medrese u Gračanici

Sadašnji objekat izgrađen je 1888. i 1899. godine na mjestu ranije zgrade Medrese koju je oko 1800. godine izgradio Osman-kapetana Gradaševića, upravitelj Gradačacke kape-tanije i otac Husein-kapetana Gradaševića, kao jedan od svojih vakufa po Gradačcu, Gračanici i Modriči. Za održavanje Medrese uvakufio je svoj imetak – brojne dućane, hanove i obradivo zemljište u navedenim mjestima. Medresa je u novije vrijeme više puta obnavljana, a temeljitije 1952. godine (jer je bila, krajem rata, potpuno devastirana i 1989. godine, kada je bila prilično zapuštena i oronula). Mi ćemo za obnovu i restauraciju Dershane, uz pomoć Gradske uprave i na druge načine obezbijediti 40 hiljada maraka. Mi-jenjamo sve, podove, prozore, strop, stolice, ali da ništa ne izgubi od autentičnog izgleda. Dershana je veliki prostor višenamjenskog karaktera. Ovim potezom naša medresa će biti još ljepše mjesto za odmor, za organizaciju raznih kuturnih i vjernih manifestacija, izjavio je za medije, glavni imam Medžlisa Islamske zajednice Gračanica Smajo ef. Mustafić.

8. 1. 2022.

Umro gračanički pjesnik Amir Mašić...



Rođen je 11. maja 1944. godine u Brčkom, gradu u kojem je, tada, službovao njegov otac Muhamed kao učitelj, inače rođeni Gračanlija. Još kao dijete (sa svega 2 godine) vratio se s porodicom u Gračanicu i ostao vjeran ovom gradu do kraja života. Radni vijek je proveo u prosvjeti, kao učitelj i nastavnik. Radio je u Sladni, Gornjoj i Donjoj Orahovici, te u Babićima i Gračanici. Penziju je dočeka u Osnovnoj školi "Hasan Kikić" u Gračanici.

Pamtit ćemo ga, ipak, najviše kao pjesnika, jer on bio jedan od rijetkih, koji poeziju nije samo stvarao, već je poeziju živio. Uvijek s olovkom, bilježnicom i pjesničkim nadahnućem, ispisivao je stihove o svome okruženju i svakodnevnici. Pisao je kao usput, lahkim i živopisnim stilom, svima razumljivim. Najviše dara iskazivao je u pjesmama za djecu, pišući sa puno smisla za dječije poimanje svijeta. Po ocjeni dobrih poznavatelja naše savremene poezije, Mašić je među dvojicom-trojicom najboljih pjesnika za djecu u Bosni i Hercegovini.

Objavio je ukupno šest zbirki pjesama: "Bosna se poroiti' ne da", "Na trenutak prošlost nek' se vrati", "Tamo pod suncem", "Ti si vječna, sevdalinko", "Čarobni svijet knjige" i "Uz malo rime pogodi ime". Svoje pjesme objavljivao i u više časopisa i revija, između ostalih i u "Gračaničkom glasniku" Sudionik

je brojnih književnih manifestacija, osobito onih namijenjenih najmlađoj publici, među kojom se ponajbolje snalazio. Velik broj pjesama ostalo je mu je u rukopisu. Neke od njegovih pjesama su uglazbljene i snimljene – među njima i pjesma “Gračanicu brda opasala”, neslužbena himna ovoga grada.

Poezija nije bila jedina ljubav Amira Mašića. Od rane mladosti bio je zaljubljenik u tehničku kulturu, a osobito u fotografiju. Brojne fotografije koje je tokom 1970-tih godina snimao po okolini Gračanice imaju kako historijsku i kulturnu, tako i umjetničku vrijednost. Posjedovao je i bogatu kolekciju fotografskih aparata, a uz to je bio i strastveni kolekcionar nosača zvuka – gramofonskih ploča i audio kaseta, kojih je sakupio na hiljade primjeraka. U njegovoj kolekciji se našlo i ponešto ratne štampe, publikacija i dokumenata, koje je (skupa sa nekoliko starih rukopisa i knjiga iz biblioteke njegovog djeda, hadži Ismail ef. Mašića, imama i mučernika) poklonio Zavičajnoj muzejskoj zbirci Gračanica.

Bio je čovjek iznimnog duha, iskreno dobrodušan i uvijek spreman na šalu. Brojne dogodovštine i anegdote, vezane uz njegovo ime bez sumnje će ostati dio savremene usmene tradicije ovoga grada i njegovih stanovnika – kako Amirovih savremenika, tako i generacija koje dolaze. Među kulturnim stvaraocima, publikom i djelatnicima u kulturi ostat će upamćen kao jedan od najiskrenijih prijatelja kulture, koji je uvijek, s interesovanjem i poštovanjem, prisustvovao kulturnim manifestacijama i dešavanjima – pa i tokom posljednjih godina svog života, već podobro narušenog zdravlja (E. Šaković).

10. 1. 2022.

Geoistražni radovi rijetkih metala na Ozrenu, naišli na burne reakcije i nezadovoljstvo građana

Interesantno je da je na istim tim lokacijama (područje Sočkovca), Geološki zavod iz Sarajeva, po odobrenju Skupštine opštine Gra-

čanica, još daleke 1969. godine, počeo svoje geoistrage koje su praćene senzacionalnim naslovima u tadašnjoj štampi. Za ilustraciju, izdajamo dobojski “Glas komunista” od 27. 8. 1969. (str. 6), koji je u dopisu pod naslovom “Na padinama Ozrena, kod Gračanice otkrivena nalazišta olova, bakra i cinka” obavijestio javnost da su stručnjaci Geološkog zavoda iz Sarajeva otkrili bogata nalazišta spomenutih metala, sa pratećim sadržajem kadmijuma, antimona i zlata. “Sadržaj navedenih metala u rudi – tvrde stručnjaci, neobično je visok, pa prema tome ova ruda predstavlja jednu od najbogatijih u Evropi po sadržaju pomenutih metala.”

Na istim lokacijama su tokom 2021. godine, nakon 52 i godine, na iznenađenje mnogih mještana, prema pisanju “Avaza”, ponovo otvoreni geoistražni radovi, koje je počela izvoditi firma “Medeni brijeg”, odnosno bijeljinska kompanija “Lykos Balkans Metals”. Nakon toga uslijedila su burna reagovanja i peticija 300 mještana Sočkovca, Kakmuža i Karanovca, koju su uputili nadležnom ministarstvu Republike srpske sa zahtjevom da se radovi odmah obustave, uz obrazloženje da će to “rudarenje” (ako se dozvoli) uništiti pitke vode, prirodu, šume i ugroziti zdravlje ljudi ne samo na Ozrenu, nego i u susjednim općinama Gračanici, Lukavcu, Dobroju i Maglaju – o čemu su već obaviješteni nadležni organi tih lokalnih zajednica. Najprije je reakcija stigla iz susjedne Gračanice, u kojoj su na sjednici Gradskog vijeća, izrazili zabrinutost i tražili provjerene informacije o tome šta se to kopa na Ozrenu. U isto vrijeme, Skupština opštine Petrovo donijela je odluku o obustavi istražnih radova na području Sočkovca. Osim opštinskih organa, zabrinutim mještanima podršku je dala i Tuzlansko-zvorička eparhija Srpske pravoslavne crkve. Za sada ne znamo kako će se ovoga puta sve to na Ozrenu završiti. Prije više od 50 godina, radovi nisu prekinuti iz ekoloških, već iz političkih razloga. Spomenute geoistrage izazvale su politički skandal, upamćen kao “bakarna

afera” u Gračanici, u kojoj su trebale pasti i neke lokalne “političke glave”. Sve se, ipak, tada završilo “miroljubivo”, iza komitetskih vrata, ali to je već neka druga priča.

14. 1. 2022.

Održana 13 sjednica Gradskog vijeća: odobrena znatna poskupljenju komunalnih usluga

Javnom komunalnom preduzeću “Komus” odobreno je povećanje cijena odvoza komunalnog otpada sa 8 na 10 KM do sedmog mjeseca i od sedmog mjeseca na 11,5 KM kada se planira početak odvoza otpada na regionalnu deponiju Živinice. JP “Vodovod i kanalizacija” povećava cijenu sa 0,94 KF na 1,20 KM po kubiku utrošene vode, a privatna firma “Eko toplane” povećanje cijena grijanja za državne institucije za 60% i za građane i privredne subjekte za 25%. Nove cijene primjenjivat će se od početka februara. To je, bez sumnje, novi udar na standard građana. Iz Gradske uprave najavili su izvjesne subvencije za socijalno ugrožene slučajeve. U tu svrhu u Budžetu grada za 2022. godinu planirano je 40.000 KM.

26. 1. 2021.

Izbor sportiste Grada za 2021. godine

U pojedinačnoj konkurenciji za *najbolje* su proglašeni nogometaš “Bratstva” Arnes Čosić i članica Karate kluba “Gračanica”, reprezentativka BiH, Mubina Rešidbegović. U *ekipnoj konkurenciji* za najbolje proglašeni NK “Bratstvo” i Ženski odbojkaški klub “Gračanica”. Ostala priznanja: Nusret Muslimović (“Bratstvo”) *najuspješniji trener*, Esed Mujačić (“Lokomotiva”) *sportski radnik*; Amina Bećirović iz JK “Pribava” i Muhamed Dizdarević iz “Bratstva” *najbolji u pionirskoj konkurenciji*; Sarah Gopo iz ŽOK-a i Muhamed Šišić iz Šahovskog kluba *najbolji u kadetskoj konkurenciji*; Esma Mekić iz JK “Pribava” i Edvin Dželimović RK “Gračanica” *najuspješniji juniori*. Za *najuspješniju školu* proglašena je Osnovna škola Donja Orahovica, a za

najboljeg nastavnika Nermin Hodžić iz iste škole; *najuspješnija srednja škola* je MSŠ Gračanica, a *najbolji nastavnika* Mirsad Selimović. *Posebna priznanja za razvoj sporta* dobili su: Alma Softić, Berina Klokić, Enes Begović, Džemal Osmić i Husejin Devedžić; *posthumna priznanja*: Suljo Mehanović, Đorđo Panić, Hazim Gopo, Hasan Korić i Ismet Okić. Manifestacija “Izbor najboljih sportista za 2021.” održana je bez prisustva publike, uz prijenos uživo u programu Radio Gračanice. Na ceremoniji proglašenja najboljih sportista Tuzlanskog kantona za 2021. godinu, reprezentativka BiH u odbojci, Edina Selimović, proglašena je za najuspješniju sportistkinju u ekipnim sportovima dok je mladi rukometaš Edvin Dželimović proglašen za najboljeg juniora Tuzlanskog kantona. (izvor: Radio Gračanica)

31.1. 2021.

Održana 14. sjednica Gradskog vijeća Gračanica: Nacrt odluke o grobljima...

...upućen je na javnu raspravu, koja će trajati 60 dana. Očekuje se uključivanje Islamske vjerske zajednice. Odluka bi trebalo da bude osnova za formiranje gradskog groblja. Na ovoj sjednici usvojen je Program rada gradonačelnika i gradskih službi za upravu za 2022. godinu, te Izvještaj o radu Gradskog vijeća i njegovih radnih tijela u 2021. godini

24. 2. 2022.

Rusija počela invaziju na Ukrajinu

Vijest je izazvala zebnju i zabrinutost u čitavom svijetu. Niko se ne usuđuje prognozirati ishod ovog rata. Zapad najavljuje sankcije, ruska avijacija ruši ukrajinske gradove... Tenkovsko-pješadijske jedinice ruske vojske prodiru u pogranične gradove Ukrajine. Putin je objavio ciljeve invazije: denacifikacija (?) Ukrajine i zaštita otcijepljenih dijelova Ukrajine (Luganjsk, Dombas), čiju je nezavisnost neposredno prije početka invazije priznala Rusija... Niko ne zna kako će se sve to završiti.

28. 2. 2022.**Vrijedna književna nagrada Gračanliji Vedadu Beganoviću – Borjenu**

Ovaj mladi Gračanlija, koji je sada profesor na Masarykovom univerzitetu u Češkoj, svoje prve književne radove svojevremeno je objavljivao i u ovom časopisu. Osvojio je prvo mjesto na međunarodnom konkursu za najbolji rukopis, prestižne Izdavačke kuće "Darma Books" iz Beograda. O toj prestižnoj nagradi, za Radio Gračanicu, izjavio je sljedeće: "Pristiglo je 430 rukopisa, raznih formi (romani, zbirke pjesama, kratke priče). Moj rukopis se našao u širem izboru od 24, pa u užem od 10. Sinoć je bila književna večer na kojoj je nas 10 čitalo svoje radove, na kraju su proglasili pobjednike. Moja priča je osvojila 1. mjesto" Radi se o novijoj Izdavačkoj kući Darma Books iz Beograda, sjajni mladi ljudi" (Izvor: Radio Gračanica).

28. 2. 2022**Održana 15. sjednica Gradskog vijeća Gračanica: Nacrt odluke o nazivima ulica – javna rasprava 90 dana**

Kako je rečeno, radi se samo o nužnom preimenovanju ulica koje već imaju svoje nazive kako bi se izbjegli nepotrebni troškovi građana i privrednih subjekata.. Predviđeno je da tokom rasprave definišu i nazivi za 23 nove ulice, koje do sada nisu imale svoje nazive.

Inače, na prijedlog Kolegija Vijeća, bez šireg obrazloženja, sa dnevnog reda ove sjednice skinut je prijedlog Statuta Grada Gračanica, sa zaključkom i da se pripremi za narednu sjednicu. Usvojene su zamjene po jednog člana u vijećima mjesnih zajednica Lukavica, Miričina i Gornja Lohinja. Izmjenom odluke o dodjeli stipendija, povećao se broj stipendija za 27 tako da će biti udovoljeno skoro svim prijavljenim, koji ispunjavaju uslove. U izvještajnom dijelu, prihvaćen je izvještaj o radu Gradonačelnika u 2021., Izvještaj o izvršenim procjenama prometa nepokretnosti i prava za 2021. godinu. Pri-

mljene su k znanju informacije o zaštiti od požara i vatrogastva i izvršenje plana zaštite od požara na području Grada Gračanica u prošloj godini i informacija o radu Turističke zajednice Grada Gračanica u prošloj godini (F. Kurtović, YouTube)

1. 3. 2022.**U Gračanici: svečano obilježen 1. mart, Dan nezavisnosti Bosne i Hercegovine**

Nakon polaganja cvijeća na Centralno spomen-obilježje Odbrambeno-oslobodilačkog rata (1992-1995) i na Partizanski spomenik i bistu J.B. Tita u gradskom parku, održana je svečana akademija, u Velikoj Sali Bosanskog kulturnog centra održana je svečana akademija na kojoj je govorio predsjedavajući Gradskog vijeća Nihad Krajinović. U svom govoru podsjetio je na ratno proljeće, 1992. godine u Gračanici, te na historijski značaj referenduma za nezavisnu i suverenu Bosnu i Hercegovinu, posebno u svjetlu najnovije međunarodne krize, nakon invazije Rusije na nezavisnu Ukrajinu. Osim ovih, manje više protokolarnih aktivnosti, vrijedi još spomenuti da je povodom Dana nezavisnosti, 24. 2.2022. u Gradskoj biblioteci održano Književno veče, na kojoj je o svom radu govorio Damir Ovcina, autor romana "Kad sam bio hodža" i "Ko sam ti ja", te zbirke kratkih priča i pjesama "Jesenji dani".

19. 3. 2022.**Iz aktivnosti Gradske biblioteke Gračanica: druženje sa književnicama Almom Taletović i Nihadom Hadžibegić Žunić**

Autorica Alma Taletović iz Bužima predstavila je četiri svoje knjige: «Smiraj duše», «Sretni ljudi», »Sretna žena» i «Lirik». Prva knjiga je zbirka duhovne poezije, dok su u knjigama «Sretni ljudi» i «Sretna žena» objavljeni tekstovi koji na neki način pokrivaju prostor između vjere, nauke i popularne psihologije. Riječ je o potpuno inovativnom i posebnom pristupu ovim temama. Iz aktivnosti Gradske

biblioteke tokom marta vrijedi spomenuti i gostovanje književnice Nihade Hadžibegić Žunić (5. 3.) koje je upriličeno povodom i u susret 8. martu Međunarodnom danu žena. Razgovaralo se o njenim knjigama, pisanju, poeziji...

31. 3. 2022.

Održana šesnaesta sjednica Gradskog vijeća Gračanica: izvještaji o budžetu i radu javnih ustanova u prošloj godini.

U 1921. godini ostvaren je Budžet u iznosu od 14.682.463 marke ili 77,42% od planiranih, a 2,08% u odnosu na budžet iz 2020. godine. Izvještaj o realizaciji Budžeta usvojen je većinom glasova. Klub vijećnika SDA bio je protiv. Izvještaj o utrošku budžetske rezerve usvojen je jednoglasno. Usvojene su i odluke o prosječnoj cijeni stambene površine i visini nadoknade za pogodnost gradskog građevinarskog zemljišta. Prihvaćeni su planovi upisa učenika u prve razrede srednjih škola za narednu školsku godinu, te izvještaji o radu u prošloj godini javnih ustanova Bosanski kulturni centar, Centar za socijalni rad i Dječje obdanište. Jednoglasno je usvojen i plan upisa učenika u prve razrede JU Gimnazija "Dr. Mustafa Karić" i JU Mješovita srednja škola Gračanica za školsku 2022/2023. Vijećnici su primili k znanju i informaciju o dodjeli stipendija učenicima srednjih škola i studentima za školsku 2021/2022. godinu. Ove godine je u odnosu na prethodnu za učenike i studente dodijeljeno 27 stipendija više. Bilo je tu i više vijećničkih inicijativa i pitanja. Izdvajamo krajnje neouobičajeno pitanje: kako se mogu dijelovi grada Gračanica izdvojiti i priključiti drugim opštinama ili gradovima, što će vjerovatno pobuditi pažnju šire javnosti. Pokrenuto je pitanje krivične odgovornosti za nezakonito smjenjivanje direktora nekih osnovnih škola.

7. 4. 2022.

Obilježen Dan oslobođenja Gračanice u Drugom svjetskom ratu

Obilježavanje je počelo 4. aprila, otvaranjem izložbe "Anne Frank – historija, historija, povijest za danas" u BKC, a nastavljeno dva dana kasnije promocijom knjige "Tuzlanski procesi 70-tih godina 20. stoljeća", prof. dr. Kadrije Hodžića. O knjizi su govorili akademici Slavo Kukuć i Mirko Pejanović, te prof. dr. Husnija Kamberović i kao i autor Kadrija Hodžić. Na sam dan, 7. aprila izostala je uobičajena svečana akademija, pa je samo položeno cvijeće na Centralno spomen-obilježje Odbrambeno-oslobodilačkog rata (1992. – 1995), Spomenik borcima NOR-a i bistu Josipa Broza Tita u gradskom parku centru grada. Istog dana održan je svečani koncert učenika Muzičke škole.

12. 4. 2022.

Pucanj topa sa stare utvrde po prvi puta označio vrijeme iftara u Sokolu kod Gračanice

Top za iftar nabavile su džematlije Sokola čak u Bosanskoj Otoci. Na tu ideju došli su poslije jedne terapije i složno krenuli u akciju. Lijep primjer njegovanja kulturne tradicije u ovom selu, u neku ruku i početak aktivnog korišćenja stare srednjovjekovne gradine. Ostatak će zapamćeno da se to se dogodilo 11-tog dana mjeseca ramazana. Nekada je navodno, pucnjem iz prangije sa brda Grič označavan početak iftara u Gračanici. (Izvor: Radio Gračanica)

14. 4. 2022.

Tematska sjednica Gradskog vijeća: na dnevnom redu – "Stanje sigurnosti u oblasti kriminaliteta i saobraćaja na području grada Gračanica"

Podloga za raspravu bio je dosta obiman materijal su obiljem statističkih podataka kojim su nadležne službe nastojale argumentovati svoj pojačan angažman i konstatacije o relativno stabilnoj situaciji u toj oblasti. U disku-

siji su postavljena i neka pitanja, date određene primjedbe i sugestije, koje će se prema zaključcima vijeća dostaviti Policijskoj upravi Gračanica, kako je napisano “s ciljem poboljšanja sigurnosne situacije građana”. Hoće li šta od toga biti ostaje da se sačeka i vidi. Za svaki slučaj zaključeno je da se formira stručna radna grupa koja će na osnovu rečenog sačiniti Akcioni plan, čijom bi se realizacijom poboljšala sigurnost građana. Što se tiče sigurnosti saobraćaja, ponovo će se pisati Direkciji cesta Federacije i TK da izdvoje pare i počnu rješavati ulaze i kružne tokove u Gračanici i drugim naseljima na saobraćajnicama iz svoje nadležnosti.

23. 4. 2022.

Uređenje okoliša stare džamije u Rašljevi kod Gračanice

Iako je prije nekoliko godina u ovom selu izgrađena nova džamija i uz nju kulturni centar, kojeg je utemeljio general Fikret Muslimović, upravo na njegovu inicijativu odlučeno je da se obnovi i stara džamija, koja je izgrađena 1934. i 1935. godine i značajnije obnavljana 1972. i 2008. godine. Prenosi se kazivanje da se prije ove džamije klanjalo u mesdžidima koji su stariji više od 100 godina. Ostaci jednog od njih u ovom selu mogu se naći i danas. Stara džamija u ovom selu je, inače, jedna od rijetkih “preživjelih” džamija ovog tipa na području Medžlisa islamske zajednice Gračanica. Tokom njenog renoviranja i obnove vodilo računa da se sačuva autentičnost i postojeće stanje objekta. Nedavno su vrijedni mještani Rašljeve uredili okoliš i podigli ogradu oko Stare džamije i tako upotunili i uljepšali ambijent oko ovog kulturno-historijskog spomenika. (F. Kurtović)

24. 4. 2022.

Najavljeno održavanje Međunarodnog sajma poduzetništva i obrta “GRAPOS-

EXPO” u Gračanici – od 17 – 20. 5. 2022.

Zadnji, deseti sajam održan 2019. godine dobio je visoke ocjene za dobru organizaciju, a prije svega dobru promociju privrednih grana od značaja za lokalni i regionalni razvoj, a i ukupni privredni ambijent. Potom je uslijedila dvogodišnja pauza radi pandemije “Korone” U DOO. “Boms-expo” Gračanica kao nosiocu organizacije Sajma pripreme su u punom jeku. Sajam ima podršku većeg broja privrednika i Gradske uprave Gračanica. “Svaki naredni sajam je potrebno dopunjavati i popravljati, pažljivo posmatrati kretanja i promjene u privrednom okruženju, kako bi sajam stalno bio aktuelan i prihvatljiv za izlagače i posjetioce. Vjerujemo da će ovogodišnji sajam biti korak dalje”, izjavio je povodom Sajma za lokalne medije gradonačelnik Nusret Helić.

26. 4. 2022.

Sanacija lokalne putne mreže – po planu

Prema šturim i nepreglednim podacima na zvaničnoj veb stranici Grada, od početka godine, nakon obavljenih procedura i nailaska ljepšeg vremena, radilo se na sanaciji **čak «30 puteva»** za koje su radovi ugovoreni prošle godine, a započeli su nakon povoljnih vremenskih uslova i završenih procedura. Za tu svrhu izdvojeno je ukupno 595.727,98 KM iz budžeta Grada Gračanica. Tako je u Stjepan Polju izvršena sanacija puta na četiri lokacije, dok su u Donjoj i Gornjoj Orahovici sanirani putevi na ukupno osam lokacija. Na najviše mjesta sanirani su putevi u mjesnim zajednicama Donja Lohinja, Miričina, Lukavica, Vranovići, Trnovci, Džakule, Lendići, Pribava te Gračanica., U toku su radovi na sanaciji puta u Babićima, Škahovici, Gornjoj Orahovici te Malešićima, a vrijednost ovih radova iznositi će 176.968,85 KM. Nisu saopštena imena izvođača radova, niti obim obavljenih poslova – dužina ili površina saniranih dionica, eventualno potpornih zidova

itd. Zna se da će se nakon završenih procedura radovi izvoditi i na drugim dionicama lokalnih puteva.

28. 4. 2022.

Održana 17. sjednica Gradskog vijeća Gračanica. Izvršenje budžeta u prvom tromjesečju iznad plana, ali...

Početak sjednice je zbog zasjedanja kolegija Gradskog vijeća (duže od predviđenog) kasnio tridesetak minuta. Od postavljenih pitanja na početku sjednice, spomenimo ona koja su se ticala organizovanja produženog boravka i dječijem obdaništu, podrške proizvođačima mlijeka, rješavanja imovinskih odnosa na lokaciji obilježja na Visu i izgradnja hidrantske mreže po mjesnim zajednicama. Pošto nije prihvaćena ostavaka zamjenika predsjedavajućeg Gradskog vijeća, sa dnevnog reda je povučena tačka kojom je bilo predviđeno da se popuni to mjesto. Što se tiče realizacije Gradskog budžeta za prva 3 mjeseca ove godine (što se našlo na dnevnom redu), Gradonačelnik Helić kao obrazlagач je rekao da je realizacija budžeta u prvom kvartalu bila uspješna. (za čitavu godinu planiran prihod je planiran u iznosu od 18.316.341 KM, a njegovo izvršenje je 3.748.560, što je nešto malo iznad plana). Međutim, razloga za zadovoljstvo ne bi trebalo da bude previše. Tako dobro budžetsko izvršenje bilježi se na svim nivoima vlasti, što nije rezultat nekih pozitivnih trendova u ekonomije, već, naprotiv, ubrzane inflacije i porasta cijena. Nakon prihvatanja budžetskoj izvještaja, vijećnici su prihvatili ažurirani plan zaštite od požara, Nacrt odluke o dodjeli priznanja Grada Gračanica za ovu godinu, Odluku o utvrđivanju javnog interesa za rekonstrukciju regionalnog puta na Bukvi, Odluku o mezarjima/grobljima, Nacrt odluke o bezbjednosti u saobraćaju, izabrali su dva člana Gradske izborne komisije. U izvještajnom- inormativnom dijelu sjednice razmatran je i usvojen Izvještaj o realizaciji programa rada Vijeća mjesnih zajednica, te

više izvještaja o radu u prošloj godini javnih ustanova kojima je osnivač Grad Gračanica: Dom zdravlja, Gradska apoteka i Veterinarska stanica (Prema izvještaju F. Kurtovića za TV TK)

30. 4. 2022.

Umro prof. dr. Galib Šljivo, istoričar, univerzitetski profesor, naučnik i istraživač, autor kapitalne edicije "Historija – Povijest Bosne i Hercegovine 1788 – 1878., u 13 knjiga.

Rođen je 15. septembra 1933. godine u selu Brčigovo, opština Rogatica u siromašnoj rudarskoj porodici. Zbog rane očeve smrti, imao je teško djetinjstvo i školovanje, jedno vrijeme bio je smješten u Vakufski dom u Sarajevu. Po završetku osnovne i učiteljske škole, radio je u više mjesta kao učitelj. U međuvremenu završio je uz rad studij historije, magistrirao i doktorirao historiju u Beogradu. Jedno vrijeme radio je kao nastavnik, a potom i direktor gimnazije u Orašju. Od 1. 1977. godine stalno je zaposlen kao predavač na Pedagoškoj akademiji u Banjaluci. Od 1987. do 1992. bio je prorektor banjalučkog Univerziteta "Đuro Pucar Stari". Od 1979. godine vodio je organizacione poslove za osnivanje Instituta za istoriju u Banjaluci, pa je od početka njegovog rada, 1. novembra 1979., bio njegov direktor, sve do 1992. godine, kada je usljed ratnih okolnosti morao napustiti Banja Luku i potražiti spas u izbjeglištvu. Nakon rata predavao nekoliko predmeta iz oblasti historijskih nauka na Filozofskom fakultetu u Tuzli. Bio je predsjednik i osnivač Akademije društveno-humanističkih nauka Tuzla i počasni član Društva historičara Tuzla i drugih naučnih društava i asocijacija.

Dao je ogroman doprinos historijskoj nauci Bosne i Hercegovine, a posebno za period 19. stoljeća. Način pristup i način istraživanja je jedinstven u bosanskohercegovačkoj historiografiji i zaslužuje posebne studije. Kako je već neko rekao radi se "o naučnoj gromadi",

sa objavljenih 13 monografija “obima oko 7.500 strana” na kojima je osvijetljeno zadnjih 100 godina osmanske uprave u Bosni. Osim toga prof. Šljivo je autor na desetine naučnih radova, učesnik na mnogim naučnim skupovima, bio je saradnik mnogih listova i časopisa. U zadnjih dvadesetak godina bio je

član redakcije Časopisa “Gračanički glasnik, na čijim je stranicama objavio više svojih vrijednih radova.

Ukopan je 2. maja 1992. godine na gradskom greblju u Orašju, gdje je i proveo najveći dio svog, plodnim stvaralačkim radom ispunjenog života.